



Kamis, 01 April 2021

Ogen: Johanes 13:1-20



Enggo Kubahan Siman Usihenndu



Enggo Kubahan si man usihenndu' kata enda mbelin kal maknana man banta. Ibas sada dampar, pang nge kita melasken kata enda man kalak sideban? Pang nge kita nurikenca kata enda man anak-anakta? Banci labo piga kalak si pang ngatakenca sabab mbelin kal tanggungjawab siarus ilakoken kenca melaskenca. Ntah pe lit nge si pang melaskenca amin mesera nepatisa. Merluken 'integritas' sue min kata si belasken ras perbahanen si lakoken kita.

Adi siperdiateken ibas kegeluhen, la sitik kalak si enggo mereken usihen ibas geluhta. Tokoh-tokoh kemanusiaan, kalak pentar, si enggo 'mendedikasiken' mereken geluhna guna kiniulin kalak sideban, arah perbahanen, pelayanen bage pe penemuan-penemuan teknologi si luar biasa sibanci sipake ras nanami kita seh paksa enda.

Renungenta paksa enda mabai kita tole ngidah perbahanen Jesus ibas sejarah doni enda dingin perdalanen kiniteken kerna keleng ate ras kuasa Dibata. Ija Jesus ras ajar-ajarNa man berngi ope wari Paskah, iburihi Jesus nahe ajar-ajarNa. Ibas paksa e Simon Petrus melala mereken penungkunen kerna kepantasenna ngaloken perbahanen Jesus e. Arah percakapen e reh tambahna pengangkan ajar-ajar kerna siibahan Jesus e janah kuga ajar-ajar arus ngusih kai siilakoken Jesus, maka ia pe arus siburih-burihen nahe, ngusih kai siibahan Jesus e.

Wari enda siinget paksa berngi Jesus ras ajar-ajar, siperingeti kerna wari Kamis Si Badia, arah kai siilakoken Jesus, man banta pe enggo isehkenNa maka enggo berena usihen man banta. Kinitruken ukur me sijadi palas si mpengasup kita guna 'siburih-burihen nahe'. Ibas kebaktin enda enggo isikapken ibas liturgi kerna sie amin langa bo kerina ngelakokenca. Tapi erti ras makna sikataken Jesus, mari susih.